



**Komunikadu Imprensa**  
**12 Dezembru 2023**  
**Munisípiu Bobonaro**

**Lia-na'in Suku Sanirin konsidera treinamentu ne'ebé JSMP fó bele ajuda no haforsa membru estrutura suku hala'o nia knaar ho di'ak no tuir lei**

Iha 06 Dezembru 2023, JSMP fasilita treinamentu ba membru estrutura suku no comunidade sira iha Suku Sanirin, Postu Administrativu Balibo, Munisípiu Bobonaro.

Matéria sira ne'ebé kobre iha treinamentu ne'e fahe ba sesaun rua. Sesaun dahuluk kona-ba demokrásia, knaar órgaun soberanu sira-nian no partisipasaun públika iha prosesu halo lei. Sesaun daruak nian kona-ba asesu ba justisa formál no knaar hosi instituisaun judisiáriu no judisiál sira iha setór justisa nian.

*“JSMP konsidera importante atu fahe informasaun ba públiku, liuliu comunidade sira iha área remota sira ne'ebé susar asesu ba informasaun kona-ba setór lejizlativu no setór justisa. Nune'e, bele hasa'e sira-nia koñesimentu kona-ba saida mak demokrasia, knaar órgaun sira Estadu nian no oinsa partisipasaun públiku iha prosesu halo lei no mós oinsa bele asesu ba justisa formál ho nia prosesu sira. Nune'e, públiku bele partisipa ativu no kontribui ba ho másimu ba dezvoltamentu nasionál iha setór rua ne'e”,* dehan Diretora ezekutivu JSMP, Sra. Ana Paula Marçal.

Treinamentu ne'e formalmente loke hosi Lia-na'in Suku Sanirin, Sr. Romeu Cairo Moises. Iha nia intervensaun, husu ba participante sira atu bele tuir treinamentu ne'e ho di'ak, nune'e, bele aprende buat ruma hodi aplika iha prátika, liuliu membru estrutura suku sira atu bele haforsa no tulun sira hodi hala'o knaar ho di'ak liután tuir lei ne'ebé iha.

Iha treinamentu ida ne'e, participante sira partisipa ativamente tanba fasilitadór JSMP uza mekanizmu ne'ebé halo ema hotu partisipa liuhosi hakerek sira-nia hanoin relasiona ho tópiu idaidak no taka iha oin, lee no depois diskute hamutuk.

Tópiu sira kona-ba demókrasia no setór lejizlativu nian ne'ebé fasilitadór apresenta mak hanesan saida mak demokrasia, saida mak Estadu Direitu Demokrátiku, saida mak knaar hosi órgaun sira Estadu nian hanesan Presidente Repúblika, Parlamentu Nasionál, Governu no Tribunál, tanba sa presiza partisipasaun públiku nian iha prosesu halo lei.

Iha parte setór justisa nian, tópiu sira kona-ba knaar sira hosi autór judisiáriu no judisiál sira hanesan juis, prokuradór, defensor, advogadu privadu no polisia. Alende knaar, iha mós tópiu kona-ba krime públiku no krime semi-públiku no saida mak knaar

no limitasaun hosi autoridade sira nian tuir lei hodi rezolve problema sira iha suku nian tuir justisa informál ka tradisionál.

Partisipante sira partisipa ativa loos iha apresenta sira nia hanoin no resposta kona-ba tópiku sira ne'e no fasilítadór kompleta de'it hanoin no informasaun balun ne'ebé seidauk kompleta. Nune'e, partisipante sira la iha tan ona kestaun ka pergunta ruma ne'ebé atu foti iha treinamentu ida ne'e.

Iha sesaun taka nian, Lia-na'in suku Sanirin husu ba partisipante sira atu bele hatutan tan informasaun ne'ebé hetan hosi treinamentu ne'e ba membru comunidade sira seluk ne'ebé la marka prezensa, nune'e, ema hothotu, liuliu membru comunidade suku Sanirin bele informadu kona-ba materia ne'ebé JSMP fahe iha treinamentu ida ne'e. Ikus liu, nia agradese tebes ba JSMP tanba bele hili sira-nia suku hodi bele fahe informasaun importante sira ne'e. Nia hatutan tan katak, mezmuke nia envolve iha estrutura suku nian kuaze tinan rua-nulu resin ona, foin mak hetan treinamentu ho informasaun sira hanesan ne'e.

Partisipante sira mai hosi membru estrutura suku sira mak hanesan, lia-na'in, xefe aldeia, delegada, delegadu no representante joventude feto no mane inklui membru comunidade sira. Totál partisipante hamutuk ema na'in 30 kompostu hosi feto na'in 18 no mane na'in 12.

*Treinamentu ne'e realiza ho apoiu finanseira hosi Governu Timor-Leste, liuhosi Fundu Sosiedade Sivil, Diresaun Serbisu Apoiu Sosiedade Sivil no Auditoria Sosiál (SASCAS), Gabinete Primeiru Ministru.*

Atu hetan informasaun liután bele kontaktu:

Sra. Ana Paula Marçal  
Diretora Ezekutiva JSMP  
Email: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)